

# Satu nostalgia



**S**ONGKOK tinggi dengan baju kurung yang diperbuat daripada kain satin merupakan pilihan kanak-kanak lelaki pada Hari Raya dalam tahun 1948. Sementara yang perempuannya pula bergaya dengan rambut yang dikerinting ataupun digulung dan berikat reben lebar.

Juadah kuih-muih Hari Raya tidak akan membawa erti sekiranya tidak ada hidangan yang dinamakan 'kepala meja' atau hidangan hiasan yang tidak berani disentuh oleh tetamu. Di sini kelihatan kuih agar-agar dipilih sebagai hidangan kepala mejanya.

Gambar *The Straits Times* ini (pada masa itu *Berita Minggu* belum wujud lagi) menunjukkan cucu-cucu kepada seorang yang bernama Haji Eusofe sedang beraya di rumah beliau. Tidak pula diketahui di manakah letaknya rumah itu. Ia dirakamkan pada Hari Raya tahun 1948 yang jatuh dalam bulan Ogos.

Menurut laporan yang disertakan bersama gambar ini, pada Hari Raya itu beribu-ribu umat Islam mengunjungi Muzium Raffles dan menonton wayang, selain daripada menziarahi rumah sanak-saudara.

**Nota:** *Berita Minggu* ingin menghubungi sesiapa saja yang terdapat dalam gambar ini. Harap telefon Editor BM di nombor 7370011.